



# Te Huinga Pukapuka o Koiri Mā te Pouako

He aratohu mō te whakaako i ngā āhukatanga  
o te kōrero paki me ngā rautaki pānui



## Kei roto:

- Ngā āhukatanga o te kōrero paki
- He rautaki reo
- He ngohe pānui

## Te Reo Matatini – Pānui Taumata 3-4

# Ngā Ihirangi

- 3 He Kupu Whakataki**  
He aha rā te pukapuka upoko?  
Mā wai hei pānui?
- 4 Te Whakaako i te Pukapuka Upoko**  
Me pēhea te whiriwhiri pukapuka?
- 5 Ngā Whāinga Ako**  
Ngā pūkenga reo  
*Weriweri*  
*Te Rau*
- 7 Te Kōrero Paki**  
Ngā āhuetanga o te kōrero paki  
Ngā wāhanga o te kōrero paki
- 9 Ngā Aronga Matua o *Weriweri* me *Te Rau***  
Ngā kiripuaki  
Te kaupapa
- 10 *Weriweri* nā Manu Te Awa ngā kōrero**
- 23 *Te Rau* nā Te Mihinga Komene ngā kōrero**
- 35 Kupu Taka**
- 36 Ngā Tohutoro**
- 37 Te Huinga Pukapuka o Koiri**

# He Kupu Whakataki

He mea nui kia mārama te tamaiti ki tāna e pānui ana. Ko te whāinga o te huinga kōrero o Koiri ko te whāngai i ngā kōrero āhua roa tonu ki ngā ākonga kia whai wāhi mai rātou ki te whakangungu i ō rātou pūkenga pānui.

Ko te mea nui ko te taha ki te māramatanga. Mā konā, e kite ai te ākonga i te take o tāna pānui, waihoki, ka taea e ia te whakaputa i ōna ake whakaaro mō tāna i pānui ai.

## He aha rā te pukapuka upoko?

Ko te pukapuka upoko tētahi o ngā tino rauemi whakaako pānui e taea ai e te tamaiti te toro atu ki tētahi kōrero he rite te hanga ki ngā momo pukapuka e pānuihia ana e ngā pakeke. He tohu tēnei kua mau i a ia ngā pūkenga matua o te pānui, otirā, e mōhio ana hoki a ia kua eke ia ki tētahi taumata anō i te ao pānui pukapuka.

I te nuinga o te wā, he roa ake, he hōhonu ake ngā pukapuka upoko i ngā pukapuka kua pānuihia e te tamaiti i mua. He huarahi tēnei e taea ai e ia te whakawhanake i ōna pūkenga whakarongo me ōna pūkenga pānui. Mā te pānui i ēnei momo kōrero ka kuhu atu te tamaiti ki te ao o ētahi atu, ka rongoa ia i ngā āhuatanga o tangata kē, o wāhi kē hoki, waihoki ka whanake tōna tirohanga ki te ao.

## Mā wai hei pānui?

Mehemea ko te **pouako te kaipānui**, e tohu ana tēnei e āhei ana te ākonga ki te noho roa ki te whakarongo me te whai i te kōrero āhua roa tonu. E mōhio ana te ākonga ki te nuinga o ngā kupu o te pukapuka me te momo reo e whakamahia ana e te kaituhi. Ka taea hoki e te ākonga te tūhonohono i ngā whakaaro me ngā kaupapa i roto i te kōrero kia whai māramatanga ia mō te kōrero.

Mehemea ko te **ākonga te kaipānui**, he tohu tēnei e āhei ana ia ki te whakamātau i ōna pūkenga pānui ki tētahi kōrero āhua roa tonu. Ko te tikanga hoki e whai māramatanga ana te ākonga ki te momo reo, ki ngā momo whakaaro me ngā kaupapa i roto i te kōrero.

# Te Whakaako i te Pukapuka Upoko

Ehara i te mea kotahi anake te huarahi e taea ai te whakaako i ngā pukapuka upoko i te akomanga. Mā te pouako tonu e whiriwhiri te huarahi e tika ana mā tana akomanga, me ngā momo whāinga e whāia ana e ia.

Kua whakatakotohia ki konei kia toru ngā huarahi e taea ai e te ākonga te toro atu ki ngā pukapuka upoko, arā, ko te **pānui ki te ākonga**, ko te **pānui takitahi**, me te **pānui arahanga**. Kei raro iho nei tētahi whakarāpopototanga o ngā painga o ngā momo akoranga e toru nei mō te pānui pukapuka upoko.

Momo akoranga	Mā wai e pānui?	Ngā painga	Taumata pānui mā te ākonga
Pānui ki te ākonga	Pouako	He ngahau. He whakatauiria i ngā pūkenga pānui. He whiriwhiri kōrero/whakaaro.	Uaua
Pānui takitahi	Ākonga	He ngahau. He kimi mātauranga. He whakamātau pūkenga pānui. He whakatauiria i ngā momo whanonga o te pānui takitahi.	Ngāwari
Pānui arahanga	Pouako Ākonga	He whakaako pūkenga pānui. He ngahau. He āta whiriwhiri whakaaro.	Taumata ako

## Me pēhea te whiriwhiri pukapuka?

He wā tōna e tika ana mā te ākonga tāna ake pukapuka e whiriwhiri, he wā anō mā te pouako kē tēnei mahi. Ko tā te pouako mahi he whakatau ko tēhea te momo akoranga (ki runga ake nei) e tika ana hei whakapakari ake ngā momo pūkenga e aronuitia ana.

Ka taea tonutia e te kaipānui te tīpako mai i te pukapuka e tika ana māna mā te āta whakaaroaro ki ēnei āhuatanga:

- ngā kaupapa e kaingākauria ana e te kaipānui
- ngā wheako o te kaipānui
- te roa me te nui o ngā kupu hou ki te kaipānui (kia toru noa iho pea i te whārangi kotahi)
- te mōhiotanga o te kaipānui ki te kaupapa.

Mehemea e pānui ana te pouako ki te akomanga, me whai whakaaro ia ki te āhua o āna kaiwhakarongo.

# Ngā Whāinga Ako

## Ngā pūkenga reo

Kei te pukapuka *He Ara Ako i te Reo Matatini* (Te Tāhuhu o te Mātauranga, 2011) ngā āhuatanga o te pānui hei whakaako ki te ākongā ki ia taumata whakaako. Kua whakarōpūhia ēnei āhuatanga ki ngā wāhanga e toru, arā, ko ngā **Āheinga Reo**, ko te **Puna Reo** me ngā **Rautaki Reo**. Ko ngā **pūkenga reo** ērā. Kua tautohua ngā pūkenga reo hei whakaako i ia akoranga.

## Weriweri

Wāhanga	Pūkenga reo	Whāinga ako <i>Kei te ako au ...</i>	Tūmahi ako
<a href="#">Hei whakapuaki</a>	Te matapae	... ki te matapae i ngā pārongo ka kitea i te kōrero mā te āta titiro ki te pikitia i te uhi me te pānui i te tapanga.	<a href="#">Kanohi Weriweri</a>
<a href="#">Upoko 1</a>	Te whakaū māramatanga	... ki te kimi i ngā kōrero a te kaituhi e whakaahua ana i tētahi o ngā kiripuaki matua i te kōrero.	<a href="#">Mō _____</a>
<a href="#">Upoko 2</a>	Puna reo	... ki te whai māramatanga me te matapaki i te reo whakaahua me te reo whakataurite a te kaituhi.	<a href="#">Te Weriweri o te Taniwha</a>
<a href="#">Upoko 3</a>	Te hīkaro	... ki te aro ki ngā tuhinga a te kaituhi hei whakatau i ngā āhuatanga tuakiri o tētahi kiripuaki.	<a href="#">Mō Kui</a>
<a href="#">Upoko 4</a>	Te ariā matua	... ki te hono atu i ōku ake wheako whaiaro mō te taniwha me te matapaki i te kaupapa me te whakahau matatika o te tuhinga.	He mahi tuhituhi kōrero paki
<a href="#">Upoko 5</a>	Te whakaū māramatanga	... ki te kimi māramatanga mō ngā āhuatanga o ngā kiripuaki i te kōrero.	He mahi uiui kiripuaki
<a href="#">Upoko 6</a>	Te matatau	... ki te pānui ā-waha me ngā reo rerekē i ngā whakawhitinga kōrero a ngā kiripuaki.	He mahi whakaari poto
<a href="#">Upoko 7</a>	Te arotake	... ki te tautohu i te akoranga whānui o te kōrero.	He mahi tuhituhi

## Te Rau

Wāhanga	Pūkenga reo	Whāinga ako <i>Kei te ako au ...</i>	Tūmahi ako
<a href="#">Hei whakapuaki</a>	Te ariā matua	... ki te tautohu i ngā pārongo matua ka kitea i tētahi kōrero.	He mahi pānui pukapuka
<a href="#">Upoko 1</a>	Te matapae	... ki te tautohu i ngā āhuatanga o te whakapuakitanga o te kōrero paki arā, te wāhi, ngā kiripuaki me te whāinga matua o te kōrero.	<a href="#">Te Whakapuakitanga o te Kōrero Paki</a>
<a href="#">Upoko 2</a>	Te whakaū māramatanga	... ki te matapaki i ngā whakaaro matua i te kōrero, me te tuhituhi rotarota poto.	He mahi tuhituhi rotarota
<a href="#">Upoko 3</a>	Te whakaū māramatanga	... ki te tautohu me te matapaki i ngā whakaaro o ngā kiripuaki i roto i te kōrero.	<a href="#">Te Tautohu Kare ā-Roto</a>
<a href="#">Upoko 4</a>	Te whakaū māramatanga	... ki te tūhono atu i ōku wheako ki ngā wheako o ngā kiripuaki i roto i tētahi pukapuka.	He mahi whakatangitangi puoro
<a href="#">Upoko 5</a>	Te ariā matua	... ki te tūhono atu ngā kōrero ā-pukapuka ki ōku ake wheako.	<a href="#">Te Ako Pūkenga Hou</a>
<a href="#">Upoko 6</a>	Te whakarāpopoto	... ki te tautohu i te kaupapa o te kōrero paki.	<a href="#">Ngā Akoranga i te Pukapuka mō Te Rau</a>

## Ngā āhuatanga o te kōrero paki

Hei tāpiri mai ki ngā pūkenga reo ka taea hoki e te pouako te whakaako atu i **ngā āhuatanga o te kōrero paki**, arā, ko te **wāhi** (*setting*), ko te **kaupapa** (*theme*), ko te **raruraru matua** (*main conflict*), ko ngā **kiripuaki** (*character*) me te **tāhū** (*plot*) o te kōrero.

Kei ngā ingoa tonu o ngā wāhanga nei ngā whakamārama mō ngā kōrero o roto:

- **wāhi** – Ko te wāhi e tū ai te kōrero. Ko te wā, ko te whenua, ko te 'ao' o te kōrero paki.
- **kaupapa** – Ko te akoranga whānui o te kōrero. Mā konei ka mārama ake tātou ki ngā āhuatanga o tō tātou ao matemate.
- **raruraru matua** – Ko te āhuatanga e whakararuraru ana i te kiripuaki matua o te kōrero.
- **kiripuaki** – Ko ngā kaikōkiri i te kōrero. He kiripuaki matua ētahi, he kiripuaki tautoko ētahi. Nā ō rātou wawata, nā ō rātou hiahia ka puta mai tētahi kōrero paki.
- **tāhū** – Ko te ara i whāia e te kaituhi ki te waihanga mai i tana kōrero, arā, ko te whakapuakitanga (*exposition*), ko te pikinga (*rising action*), ko te ekenga (*climax*), ko te hekenga (*falling action*) me te whakataunga (*resolution*).

## Ngā wāhanga o te kōrero paki

Kei te **whakapuakitanga** ngā whakamārama mō te wāhi, mō te wā, mō ngā āhuatanga hoki o ngā kiripuaki. Ko ngā momo whakamārama e whakatakoto ana i te tūāpapa o te kōrero.

Kei te **pikinga**, ka kitea te pānga o te take matua ki ngā kiripuaki, arā, ka ara mai ētahi take iti hei whakakipakipa i a rātou ki te mahi i tētahi mahi.


Kei te **ekenga**, ka tae ngā kōrero ki tētahi taumata hei reira ka puta mai tētahi otinga, tētahi akoranga rānei mā ngā kiripuaki matua.

Kei te **hekenga**, ka kitea ngā hua o te tutukitanga o te whāinga matua, o te raruraru matua rānei.

Kei te **whakataunga**, ngā whakamārama whakamutunga mō te whakatutukitanga o ngā take katoa o te kōrero.

Me mārama hoki te ākongā, ko te kaituhi tonu te kaiwaihanga o ngā kōrero. Mā konei e kite ai ia i te tūhonotanga o ngā mahi a te kaituhi me te kaipānui.

Te Tāhū o te Kōrero mō




Hei tauira:

Te Tāhū o te Kōrero mō Te Ika a Māui

Ka mau i a Māui tētahi ika nui. Nāna i tohutohu āna tuākana kia āwhina i a ia ki te patu i te ika.

Ka tono atu a Māui ki ana tuākana kia haere ia ki te hī ika i tō rātou taha. Kāore rātou i whakaae. Ka pāpōuri a Māui, ka whakatakoto ia i tētahi mahere kia taea e ia te haere ki te hī ika. Ka huna a Māui ki roto i te waka o ana tuākana. Ka tae ki te tauranga ika ka puta ake a Māui me tana matau hī ika.

Ka mahi tahi a Māui rātou ko ōna tuākana ki te patu i te ika. Ka puta mai ngā puke me ngā maunga o te whenua o Te Ika a Māui.



**Wāhi:** I te wā o ngā tīpuna.  
**Raruraru matua:** Kāore ngā tuākana i whakaae kia haere a Māui ki te hī ika.  
**Kiripuaki:** Ko Māui me ōna tuākana.

Ka kite ngā tuākana i te kaha o Māui. Ahakoa ko ia te pōtiki kua tutuki i a Māui tētahi mahi nui.



# Ngā Aronga Matua o *Weriweri* me *Te Rau*

E rua ngā āhuetanga o te kōrero paki e aronuitia ana i ēnei pukapuka. Mō te pukapuka o *Weriweri* ko ngā **kiripuaki** te aronga matua. Mō te pukapuka o *Te Rau* ko te **kaupapa** te aronga matua.

## Ngā kiripuaki

I te nuinga o ngā kōrero paki ko ngā kiripuaki ngā kaikōkiri o te kōrero. Nā ō rātou hiahia, nā ō rātou raruraru, nā ō rātou kare ā-roto ka ahū whakamua te kōrero. Ka āta whai atu te kaipānui i ngā kiripuaki kia mārama ai ia ki te ngako o te kōrero.

He wāhi motuhake tā ia kiripuaki. Ka whai tātou i te **kiripuaki matua** (*main character, protagonist*) o te kōrero. I te nuinga o te wā ka pai tātou ki a ia, kei te hiahia hoki tātou kia ea ai tōna wawata.

Ko te **kiritautohe** (*antagonist*) te kiripuaki e aukati ana i te mahi, i te wawata, i te whāinga rānei o te kiripuaki matua. I ētahi wā, nā āna mahi ki te ārai i ngā mahi a te kiripuaki matua kāore tātou e pai ki a ia.

Mā ngā mahi, mā ngā kōrero, mā ngā whakaaro tonu a te kiripuaki ia hei whakaahua. I ētahi wā, mā ō rātou kākahu, mā ō rātou kanohi, hanganga rānei rātou e whakaahua ki te kaipānui.

Anei ngā momo kiripuaki i te kōrero mō *Te Ika a Māui*:

- Kiripuaki matua = Māui
- Kiritautohe = ngā tuākana
- Mehemea he kiripuaki anō i te kōrero (arā, ko te iwi kāinga) ko ngā kiripuaki tautoko ēnei. Me whai take hoki ngā kiripuaki tautoko.

He wā tōna, ko te taiao, ko ngā kararehe rānei ngā kiritautohe – pērā i te kōrero mō *Te Waka a Rata*. Ko te mahi a ngā manu me ngā ngārara te mea e aukati ana i te mahi a Rata.

Mā te āta arohaehae kōrero paki e rongō ai te ākongā ki te ngako, waihoki, ki te hua o ngā mahi a te kaituhi, nāna ngā kupu i whakairo hei waihanga i ngā kiripuaki.

## Te kaupapa

Ko te kaupapa matua o te kōrero paki te akoranga whānui ka hua mai i te roanga o te kōrero. Nā te kaupapa, ka rongō tātou i tētahi kōrero, i tētahi tohutohu rānei mō te ao o te tangata. Anei ētahi o ngā kaupapa mai i ngā pūrākau hei taura:

- *Ko Māui me te Rā* – Mā te mahi ngātahi ka ea ai te wawata. Me ū tonu ahakoa te nui o te raruraru.
- *Ko te Waka a Rata* – Me manaaki i te taiao.
- *Te Ika a Māui* – Ahakoa te iti o te tangata ka taea e ia ngā mahi nui.

Ehara i te mea kotahi anake te kaupapa o tētahi kōrero paki. Ki te āta wānangahia, he maha tonu ngā akoranga o te kōrero paki kotahi. Otirā, koia nei tētahi o ngā painga o ngā pūrākau o neherā, arā, ko te whakatauirā mai i ētahi āhuetanga hei akoranga mā tātou i ēnei rā.

# Weriweri


## nā Manu Te Awa ngā kōrero

### Whakarāpopototanga

Ka haere atu a Mahu rāua ko Mere ki te kāinga o Koro rāua ko Kui. E pātata mai ana ki tō rāua whare ko tētahi piriti. E ai ki a Koro, he taniwha kei raro i te piriti nei e noho ana. I a rātou e hīkoi ana ki te kāinga, i kite rātou katoa i tētahi mea mā e pūkana mai ana mai i raro o te piriti. Āe rānei, he taniwha?

Ko ngā **kaupapa** o roto

- Ko te whanaungatanga i waenga i ngā kaumātua me ngā mokopuna.
- Ko ngā mahi tinihanga i waenganui i ngā whanaunga.
- Ko te wāhi ki ngā kaumātua i te whānau.
- Ko ngā kaitiaki o te ao Māori.
- Ko te wāhi ki ngā kaitiaki Māori i te ao hurihuri.
- Ko ngā tirohanga rerekē ki ngā mea weriweri.



# Hei whakapuaki *Weriweri*

<b>Arotahinga</b>	Ngā mea weriweri (kupu āhua)
<b>Rautaki reo</b>	Te matapae ( <i>Predicting</i> )
<b>Āheinga reo</b>	Rapu māramatanga i ngā pikitia
<b>Whāinga ako</b>	Kei te ako au ki te matapae i ngā pārongo ka kitea i te kōrero mā te āta titiro ki te pikitia i te uhi me te pānui i te tapanga.

## Arotahi

1. **Whakamāramahia** atu te whāinga ako ki ngā ākonga.
2. **Matapakina** te tapanga (*title*). Anei ētahi pātai hei matapaki mā ngā ākonga.
5. Me kimi mai ngā ākonga ngā kupu e hāngai ana ki tō rātou Kanohi Weriwari. Ka tāpirihia atu kia rima ngā rerenga e whakaahua ana i tō rātou kanohi weriwari.

- He aha ētahi kupu taurite mō te kupu weriwari? (Anuanu, whakamataku, kino, whakarihariha)
- Ki a koe, he aha ētahi mea weriwari?
- He aha rā pea te mea weriwari i te kōrero nei? He aha koe i mōhio ai?

## Whakaako

3. **Whakatauirahia** atu te waihangatanga mai o tētahi kanohi weriwari ki ngā ākonga. Whakatauirahia hoki ngā tūmomo kupu hei whakaahua i te āhua o tō kanohi weriwari:

- he makawe (mingimingi, tōtika, taratara, hāwaniwani)
- ngā niho (tetē, taratara, koi, tāpiki, more)
- ngā pihi (**koi**, werowero, muramura, roroa, hahaka)
- ngā karu (**kānapanapa**, pōuriuri, karepa, whero, ririki)
- ngā taringa (rahirahi, koi, turi, kore, taeturi)

(Ko ngā kupu miramira he mea tango ake i te pukapuka *Weriweri*.)

4. Ka waihanga mai rātou i tētahi kanohi o tētahi mea weriwari ki a rātou. (Whakarākeia pea ki te wūru, ki te peita, ki ngā piripiri pīataata, ki te papanga, ki te kāri tae, ki te aha kē rānei.)

### Hei tauira:

1. He makawe taratara.
2. E rua ngā niho tāpikipiki.
3. He karu ririki.
4. He taringa kore.
5. He ihu hūpē.

### Tirohia:


Patopatohia ngā kupu [free masks to print](#) ki Google.

## Whakaaroaro

Ka whakairihia ngā Kanohi Weriwari ki te pakitara, ka noho te akomanga ki te pānui i ngā rerenga a ngā tamariki.



# Kanohi Weriweri



# Upoko 1: Te taniwha

<b>Arotahinga</b>	Kiripuaki matua
<b>Rautaki reo</b>	Te whakaū māramatanga ( <i>Meaning making</i> )
<b>Āheinga reo</b>	Tautohu me te matapaki i ngā kiripuaki i te tuinga
<b>Whāinga ako</b>	Kei te ako au ki te kimi i ngā kōrero a te kaituhi e whakaahua ana i tētahi o ngā kiripuaki matua i te kōrero.

## Arotahi

1. **Whakamāramahia** atu te whāinga ako ki ngā ākongā.
2. **Matapakina** te uhi o te pukapuka *Weriweri* ki ngā ākongā:
  - Ki ō whakaaro, ko wai ngā kiripuaki i te pikitia nei?
  - Kei hea rātou?
  - Hei aha rā te tangata ki ngā tamariki nei? (Hei koroua)
  - Kei te aha ia? (Kei te haka, pekepeke, whētero, whakamataku ...)
  - He aha ngā āhuetanga o tēnei tangata? (Harikoa, pōrangī, whakakatakata ...)
4. **Pānuhia** te upoko tuatahi o te kōrero. Matapakina ngā whakautu a ngā ākongā ki ngā pātai.
  - Ko wai te kaikōkiri matua o te kōrero?
  - He aha koe i mōhio ai?
  - He aha ōna āhuetanga?
5. **Whakamāramahia** atu ngā wāhanga o te tauira tāruarua *Te Kiripuaki Matua* ki ngā ākongā. Kei te upoko tuatahi ētahi o ngā whakautu ki ngā wāhanga o te pepa nei. Heoi, ko ētahi anō ka kitea i te roanga o te kōrero. Ka pānuī takitahi ngā ākongā i te Upoko 1 ka tīmata ki te whakakī i te pepa nei mō te kiripuaki matua o te kōrero, ki a rātou.

## Whakaako

3. **Whakamāramahia** atu ki ngā ākongā, he wāhi nui tō ngā kiripuaki i te kōrero paki. Ko rātou ngā kaikōkiri i te kaupapa. Ko tā te kaituhi mahi he whakaahua i ngā kiripuaki kia tino mārama pai ai te kaipānuī ki a rātou. Whakamāramahia atu ka pānuī koe i te upoko tuatahi, ko tā rātou he whakarongo noa iho ka whakaaroaro mō te pātai, Ko wai pea te kaikōkiri matua o tēnei kōrero (kiripuaki matua rānei)?

## Whakaaroaro

6. Ka pānuī haere ngā ākongā i te roanga o te kōrero ka hokihoki atu ki te pepa nei ki te whakaoti i ngā kōrero. Anei ētahi pātai hei matapaki i roto i te wā:
  - He aha rā ngā tohu o te kiripuaki matua?
  - Ko Kui te kiripuaki matua? He aha ai? He aha i kore ai?
  - Nā wai i whakaara ake te kōrero mō te taniwha i te tuatahi?

# Te Kiripuaki Matua

Mō \_\_\_\_\_

Ki ōku whakaaro ko \_\_\_\_\_ te kiripuaki matua nā te mea

## Ngā kupu āhua e whakaahua ana i te kiripuaki matua

Tīpakohia ngā kupu e hāngai ana ki a ia.

pākiki	arohanui	whakatoī	pōrangī	whakapono
pono	mokemoke	mūrere	hiakai	hīkaka
whakahīhī	mataku	ngahau	manaaki	

## Ngā mahi a te kaituhi

Tuhia kia 2 ngā rerenga i tuhia e te kaituhi hei whakaahua i te kiripuaki matua.

1.

2.

Pānuihia ngā tuhinga a te kaituhi hei āwhina i a koe ki te tuku mai i ō ake whakaaro mō ēnei āhuatanga mō tēnei kiripuaki:

**E hia (pea) ōna tau?**

**Kei hea tōna whare?**

**He pēhea ōna whakaaro mō tōna whānau?**

# Upoko 2: Pihi koi

<b>Arotahinga</b>	Ngā kiripuaki
<b>Puna reo</b>	Reo whakaahua me te reo whakataurite
<b>Āheinga reo</b>	Tautohu me te matapaki i ngā kiripuaki i te tuhinga
<b>Whāinga ako</b>	Kei te ako au kia whai māramatanga me te matapaki i te reo whakaahua me te reo whakataurite a te kaituhi.

## Arotahi

1. **Whakamāramahia** atu te whāinga ako ki ngā ākonga.
2. **Matapakina** ngā kanohi weriweri i hangaia i te akoranga 1 (wh. 10), tētahi whakaahua o tētahi mea weriweri rānei:
  - He aha ngā wāhanga o tēnei mea?
  - He aha i weriweri ai?

### Tirohia:

Tirohia <http://www.funkidslive.com/blog/alexs-blog-ugly-animals/> mō tētahi whakaahua o tētahi mea weriweri.

## Whakaako

3. **Matapakina** te tapanga o te Upoko 2.
  - He aha rā te 'pihi koi'?
  - He āhuetanga weriweri tēnei? He aha ai, he aha i kore ai?
4. Tukuna ngā ākonga kia pānui takitahi i te Upoko 2. Me tautohu rātou ngā kupu i tuhia e te kaituhi hei whakaahua i te 'weriweri' o te taniwha. Anei ētahi kupu mai i te Upoko 2:
  - pihi koi, karu pūkanakana, karu kānapanapa, mā

5. **Matapakina** ngā kupu kua kitea e ngā ākonga. Hoatu te tauira tāruarua *Te Weriweri o te Taniwha* ki ngā ākonga. Me tuhi mai ngā ākonga kia rima pea ngā rerenga e whakaahua ana i te taniwha ki ō rātou whakaaro.
6. Tirohia te rerenga mō te āhua o Mahu (wh. 23) e mea ana 'ko ōna karu he rahi atu i te hoehā'. He whakataurite tēnei i ōna karu ki te hoehā. Ka taea e ngā ākonga te whakataurite i tētahi āhuetanga o te taniwha ki tētahi atu mea?

## Whakaaroaro

7. Ka kapi ngā ākonga i ō rātou whatu, ka pānui tētahi ākonga i tana rerenga mō te taniwha. **Matapakina** ngā pikitia i kitea ā-hinengarotia i a te kaikōrero e pānui ana. **Whakamāramahia** atu ki ngā ākonga ko tā te kaituhi mahi he whakairo i te kupu kia puta mai ai tētahi pikitia ā-hinengaro ki te kaipānui.

# Te Weriweri o te Taniwha





# Upoko 3: Te tiki pepa

<b>Arotahinga</b>	Ngā kiripuaki
<b>Rautaki reo</b>	Te hīkaro ( <i>Inferring</i> )
<b>Āheinga reo</b>	Te tautohu me te matapakina i ngā kiripuaki i te tuhinga
<b>Whāinga ako</b>	Kei te ako au ki te aro ki ngā tuhinga a te kaituhi hei whakatau i ngā āhuatanga tuakiri o tētahi kiripuaki.

## Arotahi

1. **Whakamāramahia** atu te whāinga ako ki ngā ākongā.
2. **Matapakina** te wāhi ki a Kui i te kōrero *Weriweri*.
  - He aha ōna āhuatanga tae noa mai ki tēnei wā?
  - Kua kite rānei tātou i tētahi pikitia mōna? (Kāore anō)
  - Ko Kui te kiripuaki matua o tēnei kōrero? (Kāo)

## Whakaako

3. **Whakamāramahia** atu ki ngā ākongā ka whakaahuahia te kiripuaki mā āna mahi, mā āna kōrero me ōna whakaaro. Matapakina ngā mahi a Kui tae noa mai ki tēnei wā. He aha ō rātou whakaaro mō Kui i tēnei wā?
4. Hoatu te tauira tāruarua *Mō Kui* ki ngā ākongā. Ka noho takirua rātou ki te whakaoti i te pepa.

## Whakaaroaro

5. **Matapakina** ā-rōpūtia ngā otinga.
  - He aha ngā whakaaro o tēnā tokorua, o tēnā tokorua?
  - He aha ngā rerekētanga?
  - He aha te wāhi ki a Kui i roto i te kōrero *Weriweri*? He aha rānei tana take i te kōrero?

### Hei tauira:

- He āwhina i āna mokopuna ki te kimi i te tika.
- He whakatikatika i a Koro.
- He whakaatu i te mahi tinihanga a Koro.

# Mō Kui

E whakaahua ana ngā kupu e rārangi iho nei i ētahi o ngā āhuatanga o te kiripuaki o 'Kui'.

- a) He arohanui nōna ki āna mokopuna.
- e) He wahine manaaki.
- h) He arohanui nōna ki a Koro.
- i) He wahine ngākau māhaki a Kui.

Ko tā te kaituhi mahi he whakaahua i āna kiripuaki mā te whakairo i te kupu. E whakaahua ana ngā rerenga e 4 ki raro iho nei i ngā āhuatanga o Kui. Ki ō whakaaro, he aha ngā momo āhuatanga o Kui e whakaahuahia ana? (He āwhina pea ngā rerenga 'a' ki te 'i' ki runga ake nei.)

<b>Ngā rerenga a te kaituhi mō Kui</b>	<b>Ko te āhuatanga o Kui e whakaahua ana e te kaituhi</b>
1. "Kei te kāinga ia e tatari ana mā tātou," te whakautu a Koro.	
2. "He wahine tino hūmārie tō kōrua kuia."	
3. "Me koe hoki, te kaiteka nui-o-te-ao," ko tā Kui ki a Koro me te menemene.	
4. "Ko koe kē te kutu," ko tā Kui e awhi ana i a Mere rāua ko Mahu.	
5. (Tuhia tētahi rerenga anō mō Kui mai i te pukapuka.)	

# Upoko 4: Nohoanga taniwha

<b>Arotahinga</b>	Ngā kiripuaki ( <i>Characters</i> )
<b>Rautaki reo</b>	Te ariā matua ( <i>Main idea</i> )
<b>Whāinga ako</b>	Kei te ako au ki te hono atu i ōku ake wheako whaiaro mō te taniwha me te matapaki i te kaupapa me te whakahau matatika o te tuhinga.

## Arotahi

1. **Whakamāramahia** atu te whāinga ako ki ngā ākonga.
2. **Matapakina** tētahi kōrero e mōhio ana e rātou mō te taniwha/kaitiaki (mai i tō rātou rohe, mai i hea rānei).
  - Ko wai te ingoa o te taniwha?
  - Kei hea tōna kāinga?
  - He aha ōna āhuetanga?
  - He aha āna mahi?
  - He taniwha kino, he taniwha pai rānei tēnei taniwha?
  - Mehemea ka tūtaki a Mahu rāua ko Mere ki tēnei taniwha, ka pēhea ō rāua whakaaro?

## Whakaaroaro

4. Ka pānui ngā ākonga i ā rātou tuhinga ki ngā tamariki nohinohi i te kura, i te akomanga rānei.
  - He pēhea ō rātou whakaaro ki tō rātou tuhinga?
  - He aha te tirohanga a ngā tamariki nohinohi nei ki te taniwha?
  - He mea weriweri te taniwha i ngā wā katoa?

## Whakaako

3. Ka tuhi mai ngā ākonga i tētahi kōrero mō te tūtakinga a Mahu rāua ko Mere ki te taniwha, ki te kaitiaki rānei i tō rātou rohe. Ka whakaahuahia:
  - te pūtakenga o te taniwha, o te kaitiaki rānei
  - tōna kāinga me āna mahi i tana kāinga
  - tana tūtakinga ki a Mahu rāua ko Mere
  - ngā whakaaro o Mahu rāua ko Mere i te tuatahi
  - ō rāua whakaaro i te mutunga iho.

# Upoko 5: Haerenga toa

<b>Arotahinga</b>	Ngā kiripuaki ( <i>Characters</i> )
<b>Rautaki reo</b>	Te whakaū māramatanga ( <i>Meaning making</i> )
<b>Āheinga reo</b>	Te tautohu me te matapakī i ngā kiripuaki i te tuhinga
<b>Whāinga ako</b>	Kei te ako au ki te kimi māramatanga mō ngā āhuetanga o ngā kiripuaki i te kōrero.

## Arotahi

1. **Whakamāramahia** atu te whāinga ako ki ngā ākongā.
2. Ka **matapakina** ngā āhuetanga o te taniwha i te kōrero.
  - He aha te mahi a te taniwha i tēnei kōrero?
  - Kei te pīrangi ia ki te whakamataku i ngā tamariki?
  - Mehemea e āhei ana ngā ākongā ki te uiui atu ki a Taniwha – he aha ngā momo pātai ka tukuna atu e rātou?

## Whakaako

3. Kōwhiringia tētahi tamaiti, ko tāna mahi he tū hei 'Taniwha'. Ko tā ngā ākongā mahi, he tuku i ngā tūmomo pātai hei whakautu mā 'Taniwha' – kia tino mārama rātou ki ōna āhuetanga. **Whakamātauria** ngā tūmomo pātai rerekē:
  - He aha ... ?
  - Nōnahea ...?
  - Kei hea ... ?
  - Nā wai ... ?
  - E whakapono ana koe ka ...?
  - I a koe e tamariki ana ka ... ?

I ngā tamariki e whiriwhiri pātai ana, tukuna a 'Taniwha' ki te whakareri i a ia anō mā te whakamau kākahu pea, mā te āta pānui anō i ngā kōrero i *Veriweri* mō te taniwha, kia āhei pai ia ki te whakautu pātai, anō nei ko 'Taniwha' ia.

## Whakaaroaro

4. Ka mutu ana te uiui ki a Taniwha, **matapakina** ngā kōrero i puta mai.
  - He pēhea tēnei akoranga ki a 'Taniwha'? ki ngā ākongā?
  - E whakapono ana ngā ākongā ki ngā whakautu?
  - He aha ngā uauatanga mā 'Taniwha'?
  - Kua āhua mārama ake ki a rātou ngā āhuetanga o Taniwha ināianei?

I roto i te wā, whiriwhiringia tētahi atu tamaiti me tētahi atu kiripuaki i te kōrero. Whakatūria tētahi atu uiuitanga mōna.

# Upoko 6: Reo taniwha

<b>Arotahinga</b>	Ngā kiripuaki ( <i>Characters</i> )
<b>Rautaki reo</b>	Te matatau ( <i>Fluency</i> )
<b>Āheinga reo</b>	Te tautohu me te matapaki i ngā kiripuaki i tētahi tuhinga
<b>Whāinga ako</b>	Kei te ako au ki te pānui ā-waha me ngā reo rerekē i ngā whakawhitinga kōrero a ngā kiripuaki.

## Arotahi

1. **Whakamāramahia** atu te whāinga ako ki ngā ākonga.
2. **Matapakina** ngā mahi i te kōrero paki nei tae noa mai ki tēnei wā. I te Upoko 6 kei te haere a Mahu rātou ko Mere, ko Kui ki te kimi i te taniwha i te piriti. Whakamāramahia atu ki ngā ākonga ko te 'ekenga' tēnei o te kōrero, arā, kua tae ngā kōrero ki tētahi taumata, ā, ka kite mārika ngā tamariki i te taniwha.
3. **Tautohua** ngā kiripuaki e haere ana ki te piriti; ko Kui, ko Mahu, ko Mere.
  - He aha te take e haere ana rātou? (Ko te whāinga matua tēnei o te kōrero.)
  - He pēhea ō rātou whakaaro mō te whakatutukinga o tēnei āhuetanga?
  - He pēhea ō rātou kare ā-roto i a rātou e haere ana?

## Whakaako

4. Whakarōpūhia ngā ākonga ki ngā rōpū iti nei – tokowhā pea i ia rōpū:
  - Ko Kui
  - Ko Mahu
  - Ko Mere
  - Ko te kaikōrero/ko Koro

Ka pānui ngā ākonga i te Upoko 6 hei momo whakaari. Ka whakaarohia ake mō ngā kare ā-roto o tō rātou kiripuaki i a rātou e pānui ana. Ka whakariterite rātou i tētahi whakaari poto e whakaahua ana i ngā mahi i te piriti.

## Whakaaroaro

5. Ka whakaatu ia rōpū i ā rātou whakaari poto ki te akomanga. **Matapakina** ngā tūmomo kare ā-roto e rangona ana i ngā kiripuaki nei.

# Upoko 7: Kaitoa!

<b>Arotahinga</b>	Te kaupapa ( <i>Theme</i> )
<b>Rautaki reo</b>	Te arotake ( <i>Evaluation</i> )
<b>Whāinga ako</b>	Kei te ako au ki te tautohu i te akoranga whānui o te kōrero.

## Arotahi

1. **Whakamāramahia** atu te whāinga ako ki ngā ākonga.
2. **Matapakina** ngā mahi a Koro i te Upoko 6.
  - He aha ngā whakaaro o ngā ākonga ki āna mahi?
3. **Pānuihia tahitia** te tapanga o te Upoko 7.
  - He aha te whakamārama mō te kīwaha 'Kaitoa'?

Ka tuku matapae ngā ākonga mō ngā kōrero o te wāhanga whakamutunga o te kōrero, kātahi ka pānui wahangū rātou i te upoko whakamutunga o *Weriweri*.

5. He aha rā pea te tino akoranga o tēnei kōrero? Anei e rua ngā kaupapa (akoranga) rerekē mai i te kōrero paki nei hei matapakitanga:
  - Me whakautu ngā mahi a tētahi ki aua mahi anō.
  - He pai noa iho te mahi tinihanga i runga i te ngākau aroha.
6. He aha atu anō tētahi huarahi e tutuki pai ai tēnei kōrero paki? Tukuna ngā ākonga kia tuhi i tā rātou ake whakamutunga ki te kōrero nei. Kua rerekē te kaupapa (akoranga) o te kōrero ināianei?

## Whakaako

4. **Matapakina** ngā mahi i pā i te Upoko 7.
  - He aha te whāinga a Kui mā? (He kimi utu.)
  - He mea pai te kimi utu? He aha te hua?
  - He aha te take i te whakamataku a Koro i tōna whānau?
  - I te āwangawanga nui a Kui mō te taniwha?
  - I tino pā kinotia te whānau e ngā mahi hīanga a Koro?

## Whakaaroaro

7. Ka whakairia ake ngā kōrero paki ki tētahi wāhi hei pānuitanga mā te katoa. Ka tāpiri atu ngā ākonga i ō rātou whakaaro ki ngā paki rerekē.

# Te Rau

## nā Te Mihinga Komene ngā kōrero

### He whakarāpopototanga


Nō te matenga o te pāpā o Te Rau, kua noho a Te Rau rāua ko tōna māmā i raro i te kapua pōuri. Kei te hapū a Māmā, ā, ka tangi tonu a ia i te ngarohanga o Pāpā. Kei te mokemoke hoki a Te Rau ki tōna pāpā.

Kātahi ka tae mai a Matua Te Rangi, ko te teina o Pāpā. Ka whakaako a Matua Te Rangi i a Te Rau ki te whakatangitangi puoro me te kimi huarahi e ea ai ngā mamea o Te Rau rāua ko Māmā.

E tūhono ana ngā kōrero i tēnei pukapuka ki ngā kōrero mō *Kimihia* (nā Te Mihinga Komene). Koia nei ngā kōrero mō te ao o Te Rau nō mua mai i tōna haerenga ki te kura o Kimihia.

Ngā **kaupapa** (*themes*) o roto

- Ko ngā kare ā-roto i te wā o te pōuritanga.
- Ko ngā tīmatanga hou, nō muri mai i tētahi āhuatanga taumaha.
- Ko te mahi puoro hei oranga wairua, hei hiki i te ngākau.
- Ko te ngākau manawaroa i roto i te wā o te taumahatanga.
- Ko ngā āhuatanga o te hunga mate ka ū tonu ki te ngākau tangata.
- Ko ngā momo whakamahinga a ngā taonga puoro a te Māori.



# Hei whakapuaki *Te Rau*

<b>Arotahinga</b>	Te kaupapa ( <i>Theme</i> )
<b>Rautaki reo</b>	Te ariā matua ( <i>Main idea</i> )
<b>Whāinga ako</b>	Kei te ako au ki te tautohu i ngā pārongo matua ka kitea i tētahi kōrero.

## Arotahi

1. **Whakamāramahia** atu te whāinga ako ki ngā ākonga.
2. **Rapua** tētahi pukapuka hei pānui atu ki ngā ākonga mō te wā ka pāngia te tangata e te ringa o aituā. Anei ētahi pukapuka pikitia reo Māori hei whakapuaki mai i tēnei kaupapa:
  - *Hūhū Koroheke* nā Kyle Mewburn, nā Kāterina Te Heikōkō Mataira i whakamāori
  - *Rāhui* nā Chris Szekley, nā Brian Morris i whakamāori

Pānuihia tētahi o ēnei pukapuka ki ngā ākonga, kātahi ka huri ki te matapaki i te kaupapa o te matenga o tētahi tangata.

## Whakaako

3. **Āta whakarongo** ki ngā wheako o ngā ākonga e pā ana ki ngā āhuatanga o te matenga o te tangata. **Arahina** ngā ākonga ki te *whakaingoa i ngā momo kare ā-roto* e kōrerotia ana e rātou, arā, ko te pōuritanga, ko te mamae, ko te riri, ko te mokemoke, ko te matakū, ko te wehi, ko te āwangawanga, ko te pōraruraru, ko te ohorere, ko te aha atu rānei.
4. **Arahina** ngā ākonga kia *whakaahua mai i ngā tūmomo mahi* a te tangata i te matenga o tētahi atu, arā, ka tangi, ka ūmere, ka haku, ka wahangū, ka kangakanga, ka huna, ka kōrerorero, ka noho noa iho, ka huihui, ka waiata, ka aha atu rānei. Me āta whakarongo ki ngā

mōhioatanga o ngā ākonga. Mā rātou e whakaputa *ō rātou ake wheako* mō tēnei āhuatanga – ko tāhau he āwhina i a rātou ki te whakahua mai i ō rātou whakaaro ki ngā kupu e hāngai ana.

5. **Whakamāramahia** atu ki a rātou, ka pānui rātou i tētahi pukapuka mō tētahi tama, kua mate tōna pāpā. Ka rongo rātou mō ngā kare ā-roto o tōna whānau me ā rātou mahi i te wā o te taumahatanga. Ka rongo hoki rātou mō tētahi mahi motuhake ka mahia e te tama kia piki anō te hākoakoa i te ngākau o tōna whānau.

## Whakaaroaro

6. Ka tuhi ā-rōpū pea i ētahi aratohu hei ārahi i ngā mahi kei mua i te aroaro mō tēnei kaupapa. He aha rā pea ngā momo whanonga e tika ana i a rātou e pānui ana i tēnei pukapuka?

### Hei tauria:

- Manaakihia ngā whakaaro o tēnā, o tēnā.
- Āta whakarongo ki ngā kōrero a tēnā, a tēnā.
- Kia ngākaunui tonu ki te kaupapa.



# Upoko 1: Waka ātea

<b>Arotahinga</b>	Whakapuakitanga ( <i>Exposition</i> )
<b>Rautaki reo</b>	Te matapae ( <i>Predicting</i> )
<b>Āheinga reo</b>	Tautohu me te matapaki i ngā kiripuaki i te tuhinga
<b>Whāinga ako</b>	Kei te ako au ki te tautohu i ngā āhuetanga o te whakapuakitanga o te kōrero paki arā, te wāhi, ngā kiripuaki me te whāinga matua o te kōrero.

## Arotahi

1. **Whakamāramahia** atu te whāinga ako ki ngā ākongā.
2. **Whakamāramahia** atu ki ngā ākongā, kei te nuinga o ngā kōrero paki tētahi *whāinga matua*, ko tētahi *raruraru matua* rānei. Koia nei te tino take o te kōrero.

### Hei tauira:

#### Kōrero paki

Māui me te Rā

Hōhepa te Pūru

#### Raru matua

Kāore e taea e te iwi te whakaoti i ā rātou mahi.

Kei te mokemoke a Hōhepa.

## Whakaaroaro

4. Ka noho ā-rōpū anō ngā ākongā ki te matapaki i te otinga o ngā mahi takirua:
  - He aha te āhuetanga nui i pā ki a Te Rau rāua ko tōna māmā i ngā wiki tata nei?
  - He aha te pānga o taua āhuetanga ki a rāua?
  - He aha rā pea te whāinga matua o te kōrero nei?

## Whakaako

3. Ka pānui ngā ākongā i te Upoko 1 o te pukapuka *Te Rau*, ka noho takirua ki te tautohu i te raru matua o te kōrero paki nei ki ō rātou whakaaro. Ka whakaoti rāua i te tauira tāruarua *Te Whakapuakitanga o te Kōrero Paki*.

# Te Whakapuakitanga o te Kōrero Paki

Ingoa pukapuka \_\_\_\_\_

Kaituhi \_\_\_\_\_

**Te wāhi** (Kei hea te wāhi e tū ai te kōrero paki?)

**Kiripuaki** (Whakaingoatia ngā kiripuaki.)

He aha te raru matua i te kōrero?

He aha ngā rerenga kōrero i te pukapuka e whakaahua ana i te raru matua?

# Upoko 2: Te teina o Pāpā

<b>Arotahinga</b>	Te kaupapa ( <i>Theme</i> )
<b>Rautaki reo</b>	Te whakaū māramatanga ( <i>Meaning making</i> )
<b>Āheinga reo</b>	Matapaki i ngā whakaaro matua kua whakamāramahia i tētahi tuhinga
<b>Whāinga ako</b>	Kei te ako au ki te matapaki i ngā whakaaro i te kōrero, me te tuhituhi rotarota poto.

## Arotahi

1. **Whakamāramahia** atu te whāinga ako ki ngā ākonga.
2. Ka pānui ngā ākonga i te Upoko 2. Ka **matapakina** ngā kōrero matua o roto:
  - I te tatari a Te Rau ki a Matua Te Rangi.
  - Ka tae mai a Matua Te Rangi.
  - He āhua rite tōna āhua ki a Pāpā.
  - Kua tapaina a Te Rau mōna.
  - Ka koa ngā ngākau o Māmā rāua ko Te Rau ki te kite atu i a ia.

## Whakaako

3. Ka pānui anō ngā ākonga i te rotarota ngahau a Pāpā i te whārangi 21.

*Te Rau, Te Rau*

*Taku tama nono pīhau*

*Tē aro i a au*

*Nō hea hoki tāu?*

**Whakamāramahia** atu he rotarota ngahau tēnei i tuhia i runga i te aroha o te pāpā o Te Rau mōna. Matapakina ngā āhuetanga o te reo o tēnei rotarota.

- E whā ngā rārangi.
- He ōrite te tangi o ngā kupu whakamutunga o ia rārangi.
- He kupu whakatoī, he kupu whakakatakata hoki kei roto.
- Ka mutu ana i te pātai makihoi.

4. **Matapakina** te rerekētanga o te tuku kupu whakatoī i runga i te wairua pai, ki te whakatoī i runga i te wairua kino. Ka tuhi mai ngā ākonga i ā rātou ake rotarota ngahau mō tō rātou ake ingoa, mō te ingoa rānei o tētahi tangata e arohanuitia ana e rātou.

## Whakaaroaro

5. Ka pānuihia ngā rotarota ki te rōpū, ki te hunga rānei mā rātou ngā rotarota nei. Kātahi ka whakairihia ki tētahi wāhi e taea ai e te katoa te pānui.

# Upoko 3: Taonga puoro

<b>Arotahinga</b>	Te kaupapa ( <i>Theme</i> )
<b>Rautaki reo</b>	Te whakaū māramatanga ( <i>Meaning making</i> )
<b>Whāinga ako</b>	Kei te ako au ki te tautohu me te matapaki i ngā whakaaro o ngā kiripuaki i roto i te kōrero.

## Arotahi

1. **Whakamāramahia** atu te whāinga ako ki ngā ākonga.
2. **Matapakina** ngā rotarota ngahau i puta mai i tērā akoranga. He aha atu anō ngā momo mahi ngahau e pai ana ki ngā ākonga?
  - He aha te painga o te mahi ngahau? (He whakakoakoa, he whakatā)
  - He pēhea ngā kare ā-roto i te wā e mahi ana rātou i aua mahi ngahau? (Ka koa, ka hari, ka mauritau, ka ngāwari ngā whakaaro, e tau ana)

## Whakaaroaro

5. **Matapakina** ngā kare ā-roto o Te Rau i roto i te kōrero nei.
  - He aha te take e pāpōuri ana a Te Rau i ētahi wā?
  - He aha te take i hiki ake tōna wairua?
  - Ka pāngia tonutia a Te Rau e te pōuri i ētahi wā?
  - He aha te painga pea o te mahi puoro mōna?

## Whakaako

3. **Whakamāramahia** atu ki ngā ākonga i te Upoko 3 ka whakaatu atu a Matua Te Rangi i tētahi mahi e hiki ake ai te ngākau o Te Rau. Tukuna ngā ākonga ki te pānui i te Upoko 3. Matapakina te mahi hou a Matua Te Rangi:
  - He aha te kaupapa hou i whakaatuhia e Matua Te Rangi?
  - He aha ngā whakaaro o Te Rau mō tēnei mahi āna?
  - He pēhea ōna kare ā-roto i taua wā?
  - Kei te pāpōuri tonu a Te Rau ki tōna pāpā? (Āe, engari kua riro ōna whakaaro ki kaupapa kē mō tēnei wā.)
4. Ka whakaoti ngā ākonga i te tauira tāruarua *Te Tautohu Kare ā-Roto*.

# Te Tautohu Kare ā-Roto

## Ngā kupu āhua e whakaahua ana i ngā kare ā-roto o Te Rau

Tīpakohia ngā kupu e hāngai ana ki a ia.

wehi

harikoa

harawene

mokemoke

mauritau

pōuri

rekareka

aroha

He aha ōna kare ā-roto i a ia e tiro tiro ana i ngā taonga puoro a Matua Te Rangi?

manawanui

mīharo

rekareka

rirī

pōuri

āwangawanga

mataku

He aha pea te pānga o te mahi puoro mā Te Rau?

# Upoko 4: Whakaaro rangatira

<b>Arotahinga</b>	Te kaupapa ( <i>Theme</i> )
<b>Rautaki reo</b>	Te whakaū māramatanga ( <i>Meaning making</i> )
<b>Whāinga ako</b>	Kei te ako au ki te tūhono i ōku wheako ki ngā wheako o ngā kiripuaki i roto i tētahi pukapuka.

## Arotahi

1. **Whakamāramahia** atu te whāinga ako ki ngā ākonga.
2. **Whakamāramahia** atu ki ngā ākonga he momo wairua tō ngā whakatangitangi puoro. Ka whakarongo rātou ki ētahi momo puoro, ka tautohu i ngā kare ā-roto ka puta mai i te rongotanga atu.

### Whakarongo:

Whakarongo ki ētahi taonga puoro Māori ki [www.richardnunns.net.nz/tumutumu-a-found-percussion-instrument](http://www.richardnunns.net.nz/tumutumu-a-found-percussion-instrument)

## Whakaako

3. Kohia ētahi taonga puoro (ko ngā momo taputapu puoro i te kura noa) hei whakatangitangi mā ngā ākonga. Ka whakamātauria ngā taputapu puoro e ngā ākonga.

### Ngā momo taputapu whakatangitangi puoro Pākehā:

**pakepakē** – clapper

**pere** – bell

**pōrutu/tōrino** (Pākehā) – flute

**pākiri** – drum

**tapatoru** – triangle

**pere ā-ringa** – hand bells

**hue rarā** (Pākehā) – shaker

4. Tuhia ētahi kare ā-roto i te papa tuhituhi. Ka whakatangi ngā ākonga i ā rātou taputapu puoro kia rangona taua kare ā-roto.
5. Whakarōpūhia ngā ākonga ki ngā rōpū iti. Tuhia tētahi kare ā-roto ki runga kāri, ka kōwhiringia e ia rōpū tētahi kāri kare ā-roto. Ka haere ngā ākonga ki te tito i tētahi rangi puoro e hāngai ana ki te kare ā-roto i runga i tā rātou kāri.

## Whakaaroaro

6. Ka hoki mai ngā rōpū ki te whakatangi mai i tā rātou rangi puoro. Ka noho ngā ākonga ki te tautohu i te kare ā-roto e whakaatuhia ana.

Tukuna ngā ākonga ki te pānui takitahi i te Upoko 4.

# Upoko 5: Mā te wairua e kawē

<b>Arotahinga</b>	Te kaupapa ( <i>Theme</i> )
<b>Rautaki reo</b>	Te ariā matua ( <i>Main idea</i> )
<b>Whāinga ako</b>	Kei te ako au ki te tūhono atu ngā kōrero ā-pukapuka ki ōku ake wheako.

## Arotahi

1. **Whakamāramahia** atu te whāinga ako ki ngā ākonga.
2. **Matapakina** tētahi wā i huri ngā ākonga ki te ako i tētahi mahi hou.
  - He aha te mea hou i akona e rātou?
  - Ka pā mai ētahi uauatanga ka aha rātou?
  - He aha ngā kupu akiaki a ētahi ki a rātou? He āwhina aua kupu?
  - Mehemea i haere tonu he aha te otinga? Mehemea i whakarērea noa, he aha te otinga?

### Hei mahi:

Tukuna ngā ākonga ki te ako i te mahi whiuwhiu pōro (*juggling*). Kia rua, kia toru rānei ngā pōro. Ka hoki mai ana rātou, matapakina ngā pātai ki runga ake nei.

## Whakaako

3. **Whakamāramahia** atu ki ngā ākonga i te Upoko 5 kei te ako a Te Rau ki te whakatangitangi taonga puoro. Kei te āwhinatia ia e tōna matua, e Te Rangi. Ka whakaoti ngā ākonga i te tauira tāruarua *Te Ako Pūkenga Hou*, kātahi ka whakatauritehia ō rātou wheako ki ērā o Te Rau ki te ako i tētahi mahi hou.

## Whakaaroaro

4. **Ka noho tahi** ki te whiriwhiri kōrero mō ngā otinga o ā rātou mahi.
  - He aha te mahi hou i whāia e koe?
  - I tutuki i a koe tō whāinga?
  - He aha ngā momo āhuatanga i āwhina i a koe ki te whakatutuki i taua mahi? He aha ngā uauatanga?
  - He pēhea te mahi a Te Rau?
  - He aha te whakamārama o te tapanga o tēnei upoko kōrero 'Mā te wairua e kawē'?

# Te Ako Pūkenga Hou

Ingoa \_\_\_\_\_

**Tōku pūkenga hou**

**Te pūkenga hou o Te Rau**

**Ngā uauatanga**

**Ngā uauatanga i pā ki a Te Rau**

**Ngā mea i āwhina i ahau**

**Ngā mea i āwhina i a Te Rau**

**Te otinga**

**Te otinga (o te Upoko 5)**



# Upoko 6: Waitī ana!

<b>Arotahinga</b>	Te kaupapa ( <i>Theme</i> )
<b>Rautaki reo</b>	Te whakarāpopoto ( <i>Summarise</i> )
<b>Whāinga ako</b>	Kei te ako au ki te tautohu i te kaupapa o te kōrero paki.

## Arotahi

1. **Whakamāramahia** atu te whāinga ako ki ngā ākonga.
2. **Whakaaroarohia** te whāinga matua, te raruraru matua rānei o te kōrero nei. Tirohia pea ngā mahi i te akoranga Upoko 1 Waka ātea.

### Hei tauira:

Hei tauira mō te raruraru matua i *Te Rau*:  
Kei te pāpourī a Māmā rāua ko Te Rau i te matenga o Pāpā.

Tukuna ngā ākonga ki te pānui takitahi i te Upoko 6 me te kimi ake i te whakatutukitanga o tēnei kōrero.

## Whakaako

3. **Matapakina** ngā whakaaro o ngā ākonga ki te whakatutukinga o te kōrero nei.
  - I puta pai mai te mahi whakatangitangi puoro a Te Rau?
  - I ea ai tōna wawata?
  - Kua whakatikaina te raruraru matua?

4. **Whakamāramahia** atu ki ngā ākonga he 'akoranga' kei ētahi kōrero paki, e pā ana ki ngā āhuetanga o te ao o te tangata. He aha pea te akoranga o te kōrero paki mō Te Rau?

Tirohia te tīmatanga o te wāhanga kōrero nei mō Te Rau mō ngā tūmomo akoranga o tēnei kōrero.

5. Ka whakaoti ngā ākonga i te tauira tāruarua *Ngā Akoranga i te Pukapuka mō Te Rau* mā te tuhi tohu whakaae, mā te tuhi tohu whakahē rānei mō ngā rerenga kōrero kua whakarārangihia.

## Whakaaroaro

6. Ka noho takirua ngā ākonga ki te matapakī i ā rātou whakautu.

# Ngā Akoranga i te Pukapuka mō *Te Rau*

Tuhia mai he tohu whakaae ✓, he tohu whakahē rānei ✗ i te taha o ngā rerenga kōrero mō ngā akoranga i roto i te pukapuka o *Te Rau*.

1. Me āta whakarngo ki tō kuia. \_\_\_\_\_

2. He pai te puoro hei hiki i te wairua i te wā o te taumahatanga. \_\_\_\_\_

3. Kia tūpato i te moana. \_\_\_\_\_

4. He pai te whānau hei tautoko i a koe i te wā o te pōuri. \_\_\_\_\_

5. Ka pōuri te tangata i te matenga o tētahi hoa tata. \_\_\_\_\_

6. Me whai i ngā tohutohu a tō māmā. \_\_\_\_\_

7. Me ako ki te whakatangitangi taonga puoro. \_\_\_\_\_

8. Me whai tētahi mahi pai ki a koe hei hiki i te wairua. \_\_\_\_\_

# Kupu Taka

āheinga reo	<i>language function</i>	pūkenga whakarongo	<i>listening skill</i>
aronga matua	<i>key focus</i>	puna reo	<i>vocabulary</i>
arotahi (-nga)	<i>focus</i>	raruraru matua	<i>main conflict</i>
ekenga	<i>climax</i>	rautaki reo	<i>language strategy</i>
hekenga	<i>falling action</i>	reo whakaahua	<i>descriptive language</i>
kaituhi	<i>writer, author</i>	reo whakataurite	<i>comparative language</i>
kaupapa	<i>theme</i>	tāhū	<i>plot</i>
kiripuaki	<i>character, characterisation</i>	tapanga	<i>title</i>
kiripuaki matua	<i>main character, protagonist</i>	tautohu	<i>identify</i>
kiripuaki tautoko	<i>support character</i>	te ariā matua	<i>main idea</i>
kiritautohe	<i>antagonist</i>	te arotake	<i>evaluating</i>
kitea ā-hinengaro	<i>visualise</i>	te hīkaro	<i>inferring</i>
kōrero paki	<i>fiction</i>	te matapae	<i>predicting</i>
kupu āhua	<i>adjective</i>	te matatau	<i>fluency</i>
kupu miramira	<i>highlighted or bolded word</i>	te whakaū māramatanga	<i>meaning making</i>
kupu taurite	<i>synonym</i>	te whakarāpopoto	<i>summarising</i>
matapaki (-na)	<i>discuss</i>	tuhinga	<i>document, text, writing</i>
ngohe pānui	<i>reading activity</i>	wāhi	<i>setting</i>
pānui ā-waha	<i>read aloud</i>	whāinga ako	<i>learning intention</i>
pānui arahanga	<i>guided reading</i>	whakaaroaro	<i>reflect, reflection</i>
pānui takitahi	<i>read independently</i>	whakahau matatika	<i>moral (of story)</i>
pānui wahangū	<i>read silently</i>	whakapuaki	<i>express, expression</i>
pārongo matua	<i>key information</i>	whakapuakitanga	<i>exposition</i>
pikinga	<i>rising action</i>	whakataunga	<i>resolution</i>
pikitia ā-hinegaro	<i>visual, image</i>	whakawhitinga kōrero	<i>dialogue</i>
pukapuka upoko	<i>chapter book</i>		
pūkenga matua	<i>key skill</i>		
pūkenga pānui	<i>reading skill</i>		
pūkenga reo	<i>language skill</i>		

- Barone, D. (2011). *Children's Literature in the Classroom: Engaging Lifelong Readers*. New York: The Guilford Press.
- Cameron, S. (2009). *Teaching Reading Comprehension Strategies – A Practical Classroom Guide*. Auckland: Pearson.
- Haemata (2008). *Hei Korowai Tuatahi mō te Marautanga Reo Māori – Te Whakamahi i te Marau reo Māori*. Wellington: Te Tāhuhu o te Mātauranga.
- Kia Ata Mai Educational Trust. (2008). *Pānui Arahanga*. Wellington: Te Tāhuhu o te Mātauranga.
- Te rōpū kaituhi o Aronui. (2008). *He Kura Tuhituhi me He Manu Taketake: Te Pukapuka Aratohu mā te Kaiako*. Wellington: Te Tāhuhu o te Mātauranga.
- Te Tāhuhu o te Mātauranga. (1996). *Te Reo Māori i roto i te Marautanga o Aotearoa*. Wellington: Te Pou Taki Kōrero.
- Te Tāhuhu o te Mātauranga. (2008). *Te Marautanga o Aotearoa*. Wellington: Te Pou Taki Kōrero.
- Te Tāhuhu o te Mātauranga. (2010). *Whanaketanga Reo – Kōrero, Pānui, Tuhituhi: He Aratohu mā te Pouako*. Wellington: Te Pou Taki Kōrero.
- Te Tāhuhu o te Mātauranga. (2011). *He Ara Ako i te Reo Matatini – Te Pānui me te Tuhituhi. He Aratohu mā te Kaiako/Literacy Learning Progression – Reading and Writing. A Guide for Teachers*. Wellington: Huia.

## He Mihi

He mihi tēnei ki a Stephanie Tibble nāna ngā ngohe o roto i tēnei pukapuka i waihangā. He rauemi tēnei hei āwhina i ngā pouako, hei wero hoki i te hinengaro o ngā ākongā kei ngā kura me ērā atu whakaakoranga reo Māori puta noa i te motu.

He mea whakaputa tēnei pukapuka mō Te Tāhuhu o te Mātauranga e Huia.  
39 Tiriti o Pipitea, Pouaka Poutāpeta 12-280  
Te Whanganui-a-Tara, Aotearoa  
[www.huia.co.nz](http://www.huia.co.nz)




Mana tārua i tēnei pukapuka © Te Tāhuhu o te Mātauranga 2015.

ISBN 978-1-77550-220-3

Kua noho manatā tēnei pukapuka. Atu i ngā take pēnei i ngā akoranga whaiaro, te rangahau, te arotake me te arohaehae mahi e whakaaetia ana i raro i te ture Copyright Act, kore rawa e tukuna kia tāia anō tētahi wāhanga o ngā kōrero nei, ahakoa te huarahi tā. Me mātua tonu whakaae ki te rōpū nāna te pukapuka i tā.

# Te Huinga Pukapuka o Koiri



## Kimihia

Nā Te Mihinga Komene  
Nā Scott Pearson ngā pikitia  
Item Id: 711100



## Rona

Nā Chris Szekely ngā kōrero  
Nā Te Kauru Nohotima i whakamāori  
Nā Josh Morgan ngā pikitia  
Item Id: 711101



## Te Kāinga o te Taniwha

Nā Tiana Marino-Tiakiwai  
Nā Josh Morgan ngā pikitia  
Item Id: 710883



## Te Whatukura o Tangaroa

Nā Tamati Waaka  
Nā Vaitoa Baker ngā pikitia  
Item Id: 710884



## Te Awa ki te Rangi

Nā Megan Chong  
Nā Scott Pearson ngā pikitia  
Item Id: 710885



## He Perekana Rerekē

Nā Kawata Teepa  
Nā Dylan Coburn ngā pikitia  
Item Id: 710737



## Hoariri

Nā Hans Tiakiwai  
Nā Jym Byrt ngā pikitia  
Item Id: 710695




## Me Aroha ki te Tuākana

Nā Ruihapounamu Ruwhiu  
Nā Nikki Slade-Robinson ngā pikitia  
Item Id: 710704



## He Hoa Pūmau

Nā Mereana Maika  
Nā Kim Seng ngā pikitia  
Item Id: 119141



## Ko Wai Hei Hoa Mōku?

Nā Anahera Davis rāua ko Hiria Te Moana  
Nā Debbie Tipuna ngā pikitia  
Item Id: 710338



## Kua Tohunga Kē Au!

Nā Charisma Rangipuna  
Nā Nanette Lela'ulu ngā pikitia  
Item Id: 700054



## Ara Mai He Taniwha

Nā Kiri Henry  
Nā Andrew Burdan ngā pikitia  
Item Id: 113353



## Pahū

Nā Rona Lawson  
Nā Darcy Solia ngā pikitia  
Item Id: 113355



## Te Poiwhana

Nā Te Kauhoe Wano  
Nā Andrew Burdan ngā pikitia  
Item Id: 710337



## Rāmeke

Nā Fred Te Maro  
Nā Evan Purdie ngā pikitia  
Item Id: 113354



## Raru

Nā Waikare Kruger  
Nā Kim Seng ngā pikitia  
Item Id: 116240



## Te Whati Hope

Nā Leon rāua ko Fran Hunia  
Nā Tessa Bailey-Lont ngā pikitia  
Item Id: 11274H

# Ngā Pukapuka Aratohu mā ngā Pouako



## He Aratohu mā te Pouako

Nā Stephanie Tibble  
Item Id: 711102



## Te Huinga Pukapuka o Koiri 3

Nā Stephanie Tibble  
Item Id: 710886



## He Aratohu mā te Pouako

Nā Megan Chong  
Item Id: 710773



## He Aratohu mā te Pouako

Nā Te Whānau o Huia  
Item Id: 710518

Mēna e hiahia ana koe ki tētahi pukapuka mai i te kohinga pukapuka o Koiri me toro atu ki te paetukutuku  
Down the Back of the Chair.

1. Patopatohia ngā kōrero whakauru o te kura
2. Patopatohia te ingoa o te pukapuka, te nama take (item id) rānei.

Down the Back of the Chair, [www.thechair.minedu.govt.nz](http://www.thechair.minedu.govt.nz), 0800 660 662